

## DRUHDŽE WO NAS

# Serbski sejm so měsačnje schadźuje

**Frankfurt nad Mohanom** (ML/SN). „Tohodla maja woni nětko parlament – Serbja we Łužicy, tón Serbski sejm. Reportaža wo ludžoch, kotřiž nochcedža swoju domiznu wopušćić, ale ju tworjeć. Swójski parlament za mjeńšinu. Serbski sejm je nowy – wo nim so wadža.“ Pod nadpismom „Woni sahaja za mocu“ pisa David Kreuz w měsačnym ewangelskim magacinje „chrison“ wo skutkowanju a problemach Serbskeho sejma.

Spočatnje předstaja Hanza Wylema-Keła, kiž je loni při wólbach mjez delnjolužiskimi kandidaty najwjace hłosow dóstał. „Wón ma hessenske, durinske a česke korjenje. Při wólbach pak je Serb, dokelž so k tomu wuznawa. A štóž so jako tajki wuznawa, je Serb. 49lětny serbski politikar bě w oktobrze 2018 na braniborskich alejach po puću, nimo jězow, něhdyšich wuhlowych jamow, we wsach z dwójnym mjenom, Prožym/Proschim, Wjerbno/Werben. Tura wólbneho boja we Łužicy.“ Awtor wopisuje, kak Wylem-Keł wólbne plakaty w Cazowskim (Zahsow) hosćencu „K lipje“ připrawja. Wjes z 300 wobydlerjemi mjezuje z něhdyšim Choćebuskim lětanišćom. W 50 domach

ze serbskimi mjenami je wón přeprašenja za zhromadźiznu wo zaměrach Serbskeho sejma rozdźělił. „Hanzo je sejm přednošk wo druhich regionalnych parlamentach w Europje zestajał, załoženych wot ‚črjódki kołwrotnych‘ Wali-zow, Samow, Němskobelgičanow. Pjatanace eurow je sam za wotnajenje rumnosće w hosćencu zaplaćil, zo by lisćinu ze 34 kandidaty Serbskeho sejma předstajił. ‚Činju to tež za jednoho wopytowarja.“ Z nastawka zhoniš, zo staj jenož dwaj wjesnjana na wólbne zarjadowanje přišłoj. Žona praji, hladajo na prózdne stólcy: „Ludž so politiki pasu, su mućni.“

Zhoniš wo wuwjedženjach dalšich kandidow Serbskeho sejma: „Bywši přistajeny lutowarnje z Wuskidže (Weißkeißel) chce lužiske gospodarstwo zesylnić, a to z twarom džesaćityscow drjewjanych domow, z čimž maja nowe džěłowe městna nastać. Wón rjekny: ‚Bohužel so přez dale a wjetše struktury wjesna kultura a zhromadnosć pozhubujetej. To mje do skutkowanja za sejm pohonja.‘ Dalši zapósłanc je Hajko Kozel, kiž je za Lěwicu w Sakskej krajnym sejmje, a je

jako prawiznik dobra podpěra sejmej. A 80lětna Edith Pjenkowa z Rownoho je najstarša w kruhu kandidatow.“

Dale čitaš: „Krótko do listowych wólbow je so jenož něhdže 800 ludźi do lisćiny wolerjow ‚za demokratisce legitimowane ludowe zastupnistwo wšěch Serbow‘ zapisało. Či jedni aktiwistam njewěrja, tamni maja to za paćenje, separatizm. A potom je wšak hišće Domowina. Třěšny zwjazk wulkich serbskich towarstw wobhladuje so ze swojimi 7 000 člonami jako legitimowane zastupnistwo napřećo politice. Ludž sejm pak znapřećiwjeja, zo njemóže kulturne towarstwo lud zastupować.“

W sydromstronskim přinošku z džewjeć barbnymi fotami zhoniš tež wo zhromadźiznje w Chróscicach, hdžež běchu wulke rozestajenja, a wo wuslědku wólbow loni 3. nowembra. „Wjele mjenje hač wočakowane – jenož 908 wolerjow. Ale wuzwoleny Serbski sejm njezadwěluje. Kóždy měšac schadźuje so w druhej lužiskej wsy. Jeho zapósłancy njejsu swětaćuzy. Za jich žadanjami a předewzaćemi tči nadžija za zhromadnosću, za žiwjenjehódnej domiznu wnukam.“